

忻州志卷三十三

孝義

晉

孝子劉殷字長盛新興人高祖陵漢光祿大夫殷七歲喪父哀毀過禮服喪三年未曾見齒曾祖母王氏盛冬思堇而不言食不飽者一旬矣殷怪而問之王言其故殷時年九歲乃於澤中慟哭曰殷罪釁深重幼丁艱罰王母在堂無旬月之養殷爲人子而所思無獲皇天后土願垂哀愍聲不絕者半日於是忽若有入云止止殷收淚視地便有堇生焉因得斛餘而歸

忻州志

卷三十三

孝義

一

食而不減至時堇生乃盡又嘗夜夢人謂之曰西籬下有粟窟而掘之得粟十五鍾銘曰七年粟百石以賜孝子劉殷自是食之七載方盡時人嘉其至性通感競以穀帛遺之殷受而不謝直云待後貴當相酬耳弱冠博通經史綜核羣言文章詩賦靡不該覽性倜儻有濟世之志儉而不陋清而不介望之頽然而不可侵也鄉黨親族莫不稱之郡命主簿州辟從事皆以供養無主辭不赴命司空齊王攸辟爲掾征南將軍羊祐召參軍事皆以疾辭妻張氏性亦婉順事王母以孝聞王氏卒殷夫婦毀瘠幾至滅性時柩在

殯而西鄰失火風勢甚盛殷夫婦叩殯號哭火遂越  
燒東家後有二白鳩巢其庭樹自是名譽彌顯太傅  
楊駿輔政備禮聘殷殷以母老固辭駿於是表之優  
詔遂其高志聽終色養勅所在供其衣食蠲其徭賦  
賜帛二百匹穀五百斛趙王倫篡位孫秀夙重殷名  
以散騎常侍徵之殷逃奔雁門及齊王冏輔政辟爲  
大司馬軍諮祭酒旣至謂殷曰先王虛心召君君不  
至今孤辟君君何能屈也殷曰世祖以大聖應期先  
王以至德輔世旣堯舜爲君稷契爲佐故殷希以一  
夫而距千乘爲不可迴之圖幸邀唐虞之世是以不

懼斧鉞之戮耳今殿下以神武睿姿除殘反政然聖  
迹稍羸嚴威滋肅殷若復爾恐招華士之誅故不敢  
不至也冏奇之轉拜新興太守明刑旌善甚有政能  
屬永嘉之亂沒於漢漢主聰奇其才而擢任之累至  
侍中太保錄尚書事殷恆戒子孫曰事君之法當務  
幾諫凡人尙不可面斥其過而况萬乘乎夫犯顏之  
禍將彰君過宜上思召公咨商之義下念鮑勛觸鱗  
之誅也在漢朝與公卿恂恂然常有後已之色士不  
修操行者無得入其門然滯理不申藉殷而濟者亦  
已百數有七子五子各授一經一子授太史公一子

授漢書一門之內七業俱興北州之學殷門爲盛竟以壽終

金

孝子楊正德與弟庸德俱郎中天滋之子父歿兄弟哀毀及葬同廬墓側朝夕哭踊者三年金末兵亂一家免害人以爲孝感所致

樊寶郡人天會間捐粟賑饑存活甚衆

明

孝子邢政郡人居喪廬墓同時朱聰潛郝連俱有孝行孝子廩生曹貞麟父爲流賊所戕負屍將歸中途遇賊

忻州志

卷三十三

孝義

三

疑其有財迎刃哭曰甯殺我勿驚父魂羣以爲孝子護送之其孫宗姬父早喪事祖母傅氏曲盡孝敬數十年如一日人又稱順孫

孝子邢元貞元亨郡人賣酒爲業誓不分居竭力養親以孝聞又同時生員梁田善居喪人以孝稱

孝子呂新鎬郡人父好施與常曲成之父老疾日夜不離側五年又邢昂馬雲俱以割股稱孝

孝子趙裕心郡人崇禎中以孝被旌

以上孝子俱載通志

張昇西南隅都人成化間捐粟千石賑饑與鄉飲

王經木芝二都人成化間輸粟賑饑授義官腴產讓弟

拾金還主人咸敬之

銀貴北胡村人成化六年歲祲出積粟賑濟鄉里有司  
嘉其義請旌授義官

宿昶東北隅都人成化間施粟賑饑授義官

武謙冶頭人素貧力作饒裕誓貸貲濟民償者不問利  
多寡負者不責也歲荒施粟賑饑

周仲德郡人正德間輸粟授義官性孝友債不能償者  
焚其券賑貧周急鄉人賴之

邢銓西南隅都人好施與每冬構橋南河濟涉嘉靖辛  
丑擄俘人口逃回過州餒不能行銓以餼糧給之全

忻州志

卷三十三

孝義

四

活甚衆

范永澄郡人嘉靖三十九年助賑饑粟五百石又自捐  
一千餘石境內全活甚衆

國朝

孝子李友直郡人事父母盡孝父歿有所往必負父容  
瞻禮如居家日繼母病篤醫言糞苦可愈友直嘗之  
苦一藥而愈後母復病四月思瓜有老人捧瓜過其  
門友直市之入取值其人忽不見母食瓜病竟愈乾  
隆十四年 旌表祀孝弟祠

孝子楊文奇郡人痛父失明聞見必告純孝性生至老不改歿後哀慕感動族黨爲齊民所僅見云

孝子廩生趙肯堂母早喪其父繼娶朱氏頗多嚴切肯堂小心敬事愉色婉容久而感化

孝子張星禧郡人家最貧父娶繼室竭力奉事無異所生及星禧妻死以貧故無力再偶星禧子代婦職親操井臼以事繼母厯二十年不少懈三子俱列膠庠人以爲孝行所感

孝子王作梁郡人孝友性成祖遺產薄梁躬任勤勞以共甘旨母卽世後事父彌篤父續娶繼母性悍頗加

凌虐梁和顏承受從無愠色父稔其實陰詰以杖梁曰無之母遇我厚母聞慚悔待梁加禮有弟二人梁爲之娶妻置產後弟謀析居梁任其所取概不與爭鄉里稱之

孝子宿振羲郡人母楊氏病嘗糞甘苦哀籲神明母病尋愈人以爲孝感所致

孝子王伸仲郡人秉性孝友兄弟同居四十餘年善事繼母無忤時人義之擬於田氏焉

孝子吳月桂郡人天性孝友事親存歿盡誠經府州獎勵溧水李夢龍有詩褒之

孝子盧企聖西關人事母盡孝光緒四年請 旌

孝子生員宿天爵父喪盡禮事母竭誠友愛諸弟撫之  
成立鄉里推服

孝子廩生王屏事親誠孝友愛弟昆黨庠推重

孝子高祿郡人事母周氏誠孝歷經獎勵其子庠生宗  
璧亦能紹述以孝行稱

孝子生員楊廣生事親誠孝

孝子貢生郭鎮品行端方事繼母傅氏以孝聞友愛兄  
弟和睦鄉黨學使優獎郡人士多觀法焉

孝子宿天德郡人五齡失怙祖憐而食之每抱食不下

忻州志

卷三十三

孝義

六

咽祖問故曰欲以遺母祖甚奇之奉母三十年承顏  
順志宗族咸以孝稱與兄同居貿易多年家無私積  
子明如丙辰舉人

孝子生員張玉秀孝行素著父軒病危秀聞五臺山有  
香泉可療病遂日夜步行二百餘里攜水至父飲之  
果愈母嘗病訪醫太原醫至曰須用病人子女之血  
爲引秀立刺股間血投之亦愈

孝子盧宏福解原邨人篤志孝行友愛兄弟事繼母李  
氏克盡子職李嘗卧病日侍湯藥衣不解帶者逾年  
及沒哀毀三年不御酒肉嘗置義田里中以贍疾苦

族戚鄉黨賴之

孝子張毓賢郡人幼秉至性事繼母以孝比長慷慨尚義焚券急貧鄉人重其行後長孫覺世次孫安世連登科第時以爲積德之報云

孝子王說郡人其父用極官平陽守備年甫七齡卽知左右就養後事寡母曲致豐腆二十年如一日比任越支場大使前官貯鹽八萬零沒於海商竈苦累力請豁免辦解一應公項毫無騷擾在任八載場竈德之歸田閉戶朔望必肅衣冠拜君親其不忘孝敬忠愛如此

忻州志

卷三十三

孝義

七

孝子貢生楊克明少孤事母孝生養死葬克盡禮制教  
育弟姪友愛彌篤嚴慎律躬足跡不履城市刻苦勵  
學雜誦時聞午夜忻定學者經其指授多所成就云  
孝子監生盧業父卒孝事繼母曲意承歡色養備至凡  
事稟命不敢自專彰母之節卒邀 旌榮之典及遭  
喪終祥禫猶哀慕不已  
孝子生員李見龍家貧事父以孝聞父歿事繼母曲盡  
其歡心待義兄友愛里人稱之  
孝子生員張珽南高村人孝事父母友于兄弟和鄉黨  
而訓後學士子觀感咸知奮勵

孝子聶登雲樊家野場村人家赤貧奉養雙親勉盡子

職間里稱之其子聶花亦能繼父志

孝子太學生楊華祝爲人孝友

海甯陳文勤公  
給至性惇倫匾

孝子張新芝東樓村人因殘廢不良於行恒以手代足  
不過數里父卒母無所養新芝行乞奉母每得甘美  
必另儲一囊雖飢不忍食留以供母或得錢亦儲積  
爲母衣履資行或稍遠不能歸遇同村人必託寄食  
物屬其轉達現在某鄉不令母懸望如此二十年母  
歿棺殮之具皆其平日勾乞銖積營備旣葬畢泣告  
族人曰今大事已矣願君等將我納諸父母壙中我

甘心焉族人驚曰是何言吾等爲爾謀衣食今後毋  
庸乞也新芝曰我形體不全不願生活久矣徒以老  
母故茲無所繫念安忍留此支離之身自累而復累  
人乎族人不聽強扶掖以歸終不食而死傳載藝文  
孝子石連城字易璧段家莊人六歲而孤孝事孀母嘗  
泣曰吾不獲聞父教終身之憾也凡遺物無不珍藏  
什襲居恆頃刻不離膝下間出從未嘗過宿母有憂  
必曲意寬解年老猶作嬰兒戲以娛親母晚年得怔  
忡疾連城日夜奉侍衣不解帶十有二年飲食親嘗  
寢興親伺無少懈一日延醫視疾醫曰疾不可爲連

城再四言可療醫問故囁嚅而對曰糞尚苦醫愕然治之果減逾歲又劇復嘗之泣曰茲不可爲也糞甜矣母旋卒哀毀迫切見者爲之掩泣母以守節故生時已旌表建坊至是崇祀入祠遇父母忌日必率子孫齋肅致祭連城有二姊後俱貧生籌衣食歿爲棺殮諸甥得以成立皆連城之力也里人欲舉其孝行力辭遂寢於道光丁酉年卒八十二歲二十八年請旌前知州曹森別有傳紀其事今其孫曾蕃衍多列膠庠人謂孝德之報云

孝子王侃東張村人父三義於康熙辛巳年客豫侃甫

忻州志

卷三十三

孝義

九

十齡越十六年音問杳然侃欲往尋衆曰河南地方遼闊行將焉往况存亡未卜徒自苦耳侃不聽謂其妻曰吾將尋父苦無資欲質汝衣飾得三五千文爲旅費妻諾他日以告父婦翁聞之曰壻有此孝心願少助毋庸質也將行侃族叔三魁曰汝年幼未出門吾曾游汴願偕汝行侃於冠上書一帖注姓名年貌有告之者前有山西人今在宜陽南山下種棉侃聞卽蹤跡之至宜陽投宿旅寓主人指示侃趨前伏地嗚咽不能言三魁繼至三義曰吾弟來此爲誰三魁曰爾次子侃也相持而哭遂父子歸里此康熙五十

六年事也侃兄弟析居家徒四壁僅薄田數畝三義  
曰夙逋期以歸償今若此何面目相見將北出雁門  
侃曰兒跋涉數千里甫自南歸又忍復之北乎遂盡  
鬻產以償債負傭力養父以終同治七年請 旌

孝子侯進璋南蕭村人父三接於乾隆壬寅年赴山海  
關外計離家二十三年矣初三接出寄書輒得報三  
年後浮沈不達疑有故遂不寄書亦不歸歲愈久滋  
疑愈甚三接去時璋僅七歲或語及父容卽慘變稍  
長欲尋父時祖父年邁叔父亦遠客於外弟稚母恒  
多病賴璋經營以養是以不果行後璋娶妻生子依

舅服賈藉覓父耗兼籌資爲尋親計數年悉未得當  
璋以徒遷延歲月資終不獲且祖父年愈高恐不能  
待也乃決計辭祖父及母部署家事得十餘金有中  
表董姓釀金助其匱乏固辭不受毅然以行值大風  
雪有阻之者璋泣曰我不得父實天地間一罪人耳  
今不得吾不歸矣遂與鄉人寇姓偕往抵山海關例  
禁非有印信不許出復迂道北口寇姓屢欲返因感  
璋誠孝與俱往黃沙彌漫曠無人煙行至船廠聞父  
曾一至後無確所意仍在東也留寇獨往或日行泥  
淖履爲之穿或山深林密虎豹咆哮璋情益愴志益

厲而氣益壯子身無恙至鴨綠江又無舟以濟刳木以渡稍偏倚卽沉溺艱苦備嘗至甯古塔有潞人馮富春在思次往踪跡之轉輾稽詢聞十道梁有種煙者侯性不知其名璋疑卽父猶相去百餘里奔赴以往告其鄰詭以同鄉見及見父已蒼然老矣訊得實拜伏嗚咽不能起三接猶不信鄰以實告隨語家人瑣屑事痛哭曰真我子也何以至是見者皆爲之泣下於是父子偕歸璋去時嘉慶九年正月次年始回往返年餘徒步萬里非至誠所感而能若是乎方璋之將歸也苦無資稱貸於鄉人有託寄數十金還家

者途次遺失璋多方設措以償之其不苟如此同治元年請 旌入祠

孝子郝于理董村人事母盡孝母疾割股以進鄉人至今稱之

孝子生員焦潛修字靜齋本城人幼不好弄就外傳終歲不出塾其沉靜如此母得癱瘓疾動止需人侍養不倦疾轉劇潛修壹意湯藥衣不解帶者三年偶然外出母卽呼泣雖羣子婦在側弗善也後母歿潛修號泣三晝夜水漿不入口父再四諭之乃勉進饘粥及父再娶事之無異所生患病瀕危父憂虞益甚潛

修對曰可無憂疾尋愈父再三詰問囁嚅而言曰糞味苦以是知之衆愕然相顧始知於前母疾時已數數試矣後疾危殆父臨視猶勉強笑迎自謂無恙以寬父憂卒之夕諄諄屬姪讀某書習某字孝經人之綱紀尤宜熟讀也里人石皓有傳詳其事道光二十八年請旌

孝子上佐都潘萬錦孝行著於鄉里親疾嘗糞嘗藥侍養惟謹嗣親歿一切如禮葬畢卽廬於墓側日夕哀泣二十餘年無少間嗣錦子念父衰老穴居已久乞求家居錦不忍離族戚屢屢勸慰強之始歸猶每日

忻州志

卷三十三

孝義

十一

再三往省如事生然性友愛事兄亦恭順凡有爲必稟命而行不敢自專前知州曹森給予孺慕終身額表其閭里人石皓有潘孝子廬墓序載藝文咸豐十一年請旌

孝子寇體中豆羅都人五歲喪母哀毀如成人少孤事繼母以孝聞家貧得甘旨輒躬執爨以供母母病篤衣不解帶半載有餘求醫問卜藥必嘗而後進及母歿哀號成疾一藥而愈人以謂精誠所感光緒四年請旌入祠

孝子王生榮本城人生有至性年十二而孤事母能以

色養母晚年失明生榮一夕兩鬢皆白出入起居未嘗離左右母每患寂悶時侍列笑語以博歡心每食必親操七箸以進不假人手妻妾有違失叱令長跪乞母訓責而後已如是十餘年母嘗語人曰吾無目以吾子爲之目如未嘗瞽也嗣母卒哀毀幾至滅性餒粥三年凡母所遺衣物別置一室見輒流涕祭日必爲文以告某物在某處或稍移動卽怒責之服闋恆鬱鬱不得遂邁疾卒生榮善書喜吟詠自母故後皆屏除不爲有窶人負母行乞亦失明生榮見之慨然給以衣食於是者二年歿給喪具其能錫類如此

同治七年 旌表入祠

孝子尹村生員張樹儀少孤家貧無期功親其舅氏貨麪爲業遂往依焉儀母爲之操作若傭兄恒止之儀母曰吾有子胡可坐食及儀長讀書穎悟州試冠軍游庠屢試不售因母老病遂棄舉子業朝夕奉侍不離歷數寒暑後母病篤親嘗糞甘苦母歿哀毀盡禮既葬時至墓前介然成路舅氏病親奉湯藥事之如父舅家漸落儀鬻產爲營喪葬或以爲過儀日以人之財濟人之事於我何傷先是舅家析產嘗分給儀母人稱其友愛儀性謙冲不苟言笑課門人每解經

至孝弟等篇輒潛然涕下至性如此前學使黃侍郎  
鈺嘗欲舉儀孝廉方正前知州戈濟榮給予恪恭克  
孝匾表其門年七十臥病動輒需人其子亦以孝聞  
孝子劉允恭解原村人甫九齡母得痿疾卽能順意承  
志因得漸次痊可越十年母恙復發允恭曰益惶懼  
祈禱於神願以身代扶持抑搔親滌穢濁如是者十  
五年母卒哀痛失聲喪葬如禮里黨稱之

孝子九原鄉金村郭王庸其父貿易蘇州久不返去時  
其母方孕數月生庸其父不知庸而庸亦不知父之  
遠客於外也庸甫數歲母病卒其祖母尚在辛勤撫

育稍長卽問父所在祖母泣告以故庸罔然有思急  
欲赴蘇尋父迫於貧不果又聞父有將歸之耗乃止  
其舅氏貿易陝西之鎮橋堡挈庸往甫至卽得父凶  
問大痛欲往舅氏以其齒稚阻之不可泣曰我男子  
忍令父暴骨於異鄉乎竟辭歸苦無資用僅有屋數  
椽因貨其半行至蘇郡無覓處乞食於市遇忻之商  
於蘇者詢之知爲尋父而來爲之感泣徧訪墓所始  
得之因齧指血驗之信遂負父骨以歸與其母合葬  
焉庸事祖母亦孝謹後家漸小康

孝子趙文選前播明村人咸豐戊午科舉人性最孝少

時就外傳咕嗶之間每思親輒潛然淚下後年逾五十猶嬉戲以娛親母賀氏臥病常日夜侍養無倦容孝子李呈楨本城人幼孱弱多疾讀書至夜分不休父每促使早眠恐其過勞致疾也甫弱冠父卒哀泣氣幾絕少頃泫然曰吾不獲事父尚有母在當竭孝養以贖不孝之罪家貧弟妹幼稚授徒自給每以甘旨奉母有疾卽不離左右後母病危殆醫藥罔效祈禱於神得籤方尋愈越十餘年母恙復作楨憂慮成疾遂卒不數日母亦歿

孝子雙白留都郭利仁少孤賴母撫育成立利仁甫七

忻州志

卷三十三

孝義

十五

歲卽能順志承顏問寢視膳蓋出於至性迨年二十有先人遺肆在塞外因不忍遠離遂多給貲用倩人爲之經理凡族姻有慶弔事雖暮必歸母年七十餘得癱瘓疾藥必嘗而後進沈疴八年衣不解帶祈禱於神願以身代旣歿居喪以禮哀毀幾至氣絕痛母青年守志嘗謂人曰罔極之恩何時可報服勤孝養始終無倦母已請 旌入祠

孝子石家莊楊生榮父萬億攜弟隨祖父至新疆貿易徙居無常音問罕通萬億出門時榮方孕六月家苦貧年十四母卒依繼祖母季父卽能得其歡心逾年

亦服賈河曲恒念父祖不置欲往尋祖母力止之云  
渠三人去而不返良足悲今又益汝而四且無貲不  
可往榮脉脉不語所獲傭資除寄家外銖積數十緡  
咸豐十年跪啓祖母願尋父祖歸時有中表劉姓曾  
商烏魯木齊悉父所在約與偕往見父泣不成聲父  
亦悲喜交集見者爲之垂淚詢知祖父歿於喀什噶  
爾仲父淹留葉爾羌相隔又四五百里父欲往榮以  
父老病諫阻隻身至葉爾羌見仲父明年同赴喀什  
噶爾扶祖父旅櫬回烏城遂兄弟父子移櫬同歸榮  
往返二萬數千里歷時十九月其艱難險阻有不可

言語形容者榮幸無恙卒成其志殆陰有鬼神呵護  
俾盡其孝思同治七年里人公舉其孝前知州戈濟  
榮給予孝行可風匾表其門

周于義國學生稟性剛方素行嚴正鄉黨望而敬之以  
義方訓子待族黨廓然一體尤善解推康熙十九年  
歲饑煮粥賑濟全活無數

焦浴暉廩監富而喜施康熙三十六年孟壽二縣荒流  
民至本村者給以衣食又四十二年本郡饑煮粥放  
賑外每人給米一升其他種種善行大都類此子天  
佑亦能恪守父志

彭瓏國學生素多義行有本村窮民二家皆以無度鬻妻瓏惻然力止之給以衣食並畀貿易之資至今兩家完聚皆瓏之力也嘗捐百金平蝦墓坡建立茶棚行者便之

張文英監生好善樂施康熙二十九年歲饑煮粥濟貧全活甚衆

李昇郡人嘗適陽曲遇貧民戚喜父母衰老子女尚幼忽病疽養生無資不得已鬻妻王氏議價四十五兩昇聞之卽如數輸銀與喜令毋離散以保全一家性命焉

忻州志

卷三十三

孝義

十七

陳永年嘉禾村人急公好善創州南郭外茶房解行旅之渴又與里人傅選侯元等造牧馬雲中二河橋梁平生善行甚多年八十餘無疾卒時以爲坦化云按永

年著有苦行歌俱係實蹟嫌行文欠雅以是未載

王某佚其名其孫名吉祥前東高村人由奇村歸見道旁有遺囊停車拾取展視皆錢帖約八九十千又云四百因語僕曰此物如遇貧人遺失攸關性命遂折回奇村訪問遇失者正惶遽失色曰非君則吾命休矣願以一半酬之王不肯曰此本爾物何酬爲卒不肯受里人稱之

趙金保韓嚴村人道拾孟秉義遺金孟覓趙還之里人  
稱爲長者

周述利遠家莊人平生好善常平治道路以利行人里  
人立善行碑紀其事

王琅六石村人輕財好施予道光十二年歲祲穀價翔  
貴琅減價平糶里人薛河東有文紀其事